

TARIKH : 20 APRIL 2022
AKHBAR : BERITA HARIAN
MUKA SURAT : 12

Bidang pertumbuhan strategik lonjak kembali ekonomi negara

Bidang pertumbuhan strategik lonjak kembali ekonomi negara



Oleh Christina Cheah
bhrencana@bh.com.my

Meskipun tidak terkecuali mengalami kesan ekonomi akibat COVID-19, Malaysia masih berdaya tahan dengan asas ekonomi kukuh, disokong pelbagai langkah dilaksanakan kerajaan untuk mengurangkan kejatuhan ekonomi.

Prospek jangka sederhana negara juga kekal utuh. Namun, bagi memastikan pertumbuhan mampan, Malaysia perlu meningkatkan hubungan perdagangan dan pelaburannya.

Pembaruan dalam perdagangan dan pelaburan kerajaan berterusan adalah penting untuk membuka laluan bagi memudahcarakan lagi pemansuhan tarif atau mempermudah halangan bukan tarif serta membatalkan had pelaburan.

Pemeteraian perjanjian Perkongsian Ekonomi Komprehensif Serantau (RCEP) menjadi langkah ke arah yang wajar kerana ia boleh membantu mengurangkan kos perdagangan bagi perniagaan dengan memansuhkan banyak halangan perdagangan di rantau ini. Pada masa sama, menggalakan lebih banyak aktiviti perdagangan antara Malaysia dengan beberapa rakan dagangan utamanya.

RCEP terdiri daripada 15 negara anggota merangkumi kira-kira 30 peratus daripada penduduk dunia dan 30 peratus daripada Keluaran Dalam Nera Kasar (KDNK) global, sekali gus perjanjian perdagangan bebas pertama dalam kalangan ekonomi terbesar di Asia memabitkan Australia, New Zealand, blok ASEAN, China,

Jepun dan Korea Selatan.

Sebagai hab strategik di ASEAN dengan asas ekonomi kukuh, Malaysia berada pada kedudukan ideal untuk mengukuhkan perdagangan rentas sempadan dan hubungan ekonomi dengan rakan niaganya di RCEP.

Akses negara kepada pasaran RCEP lebih meluas memberi peluang kepada perniagaan di sini untuk mengembangkan operasi mereka di seluruh rantau ini dan juga memudahcarakan akses dipertingkatkan kepada ahli RCEP yang ingin melabur di negara ini.

Mempergiat usaha Malaysia untuk menarik pelaburan langsung asing (FDI) juga penting, terutama terhadap ketika berlakunya penyusunan penawaran FDI global dan persekitaran semakin kompetitif.

Kemajuan ketara tercapai apabila Bank Negara meliberalisasikan lagi sokongan dasar pertukaran asing, memudahcarakan persekitaran bagi aktiviti ekonomi domestik dan rentas sempadan lebih kondusif.

Namun, banyak lagi yang perlu dilakukan kepada rangka kerja pelaburan di negara ini bagi memudahkan Perbadanan Multinasional (MNC) melabur di negara ini. Antara langkah boleh dilaksanakan termasuk menyemak semula senarai pelaburan negatif, menyediakan insentif cukai bagi sektor tertentu, memperkemas proses untuk mempercepat proses kelulusan pelaburan dan kerehah birokrasi serta memacu pembangunan sumber manusia dan tenaga kerja negara.

Meskipun isu ini sudah dibangkitkan sebelum ini dan sedang dipertimbangkan jabatan berkenaan, wujud dorongan kuat agar pembaruan dicadangkan segera dilaksanakan agar

menjadi kenyataan.

Pada masa sama, syarikat yang ingin melabur di negara ini mendapati mereka berada dalam persekitaran amat berbeza daripada persekitaran sebelum pandemik. Bagaimana untuk menyesuaikan perniagaan dan perkara yang perlu diberi keutamaan dalam persekitaran baharu ini menjadi persoalan strategik mempengaruhi cara organisasi ini menentukan hala tuju mereka pada masa hadapan.

Dari perspektif perbankan, beberapa aspek paling kritikal akan mempengaruhi syarikat termasuk akses kepada pembiayaan, peningkatan integrasi teknologi ke dalam perniagaan dan penerimaan penyelesaian kewangan lestari.

Pasaran modal Malaysia antara pasaran paling cair dan maju di rantau ini. Permintaan meningkat terhadap terbitan bon dan sukuk berkualiti baik dan bertambahnya pilihan pembiayaan hijau serta lestari, meningkatkan kebolehpasaran dan kecekapan pasaran modal negara disertai minat kukuh daripada pelabur meskipun berdepan dengan persekitaran pasaran mencabar.

Pelan Induk Pasaran Modal (CMP3) Suruhanjaya Sekuriti Malaysia (SC) berperanan penting dalam memanfaatkan kekukuhan dan potensi pasaran modal Malaysia untuk memacu pertumbuhan ekonomi mampan serta inklusif.

Ini adalah penting untuk menyokong - pihak bank dalam usaha mengumpulkan dana diperlukan syarikat korporat untuk membiayai pertumbuhan perniagaan dan pelaburan mereka. Sepanjang dua tahun lalu, kita menyaksikan bagaimana COVID-19 memacu integrasi teknologi ke dalam perniagaan, membolehkan organisasi membina ketahanan dan menyediakan peluang baharu untuk pertumbuhan - khususnya dalam aspek seperti memanfaatkan populasi pengguna e-dagang yang kian berkembang serta mengambil kesempatan atas rantaian penawaran direvolusikan teknologi.

Proses pendigitalan perkhidmatan kewangan menjadi faktor utama membolehkan syarikat korporat mengembangkan perniagaan di dalam dan di luar negara. Ini membawa peningkatan permintaan terhadap penyelesaian perbankan digital dan penyelesaian rentas sempadan lancar dilaksanakan melalui platform.

Kesedaran mengenai ancaman terhadap alam sekitar mempengaruhi sektor kewangan dengan keputusan berkaitan pasaran modal kini berdasarkan risiko, pulangan dan impak. Pada masa sama, kemunculan instrumen berkaitan sosial dan kelestarian meluaskan skop pembiayaan untuk manfaat alam sekitar dan sosial lebih meluas.

Di samping itu, pelabur kini lebih berminat untuk mendapatkan maklumat mengenai prestasi, risiko, peluang dan prospek jangka panjang syarikat. Menjana modal akan menjadi lebih sukar bagi syarikat tidak mempunyai pelan peralihan lestari jelas. Semuanya berikutan meningkatnya minat pelabur terhadap produk kewangan hijau dan lestari.

Asas kejayaan ekonomi Malaysia bukan sahaja masih utuh, dalam pelbagai sudut, ia diperkukuh susulan berlakunya pandemik. Namun, sekiranya negara ingin meraih manfaat dan peluang sepenuhnya ke arah pemuliharaan dan pembangunan, ia perlu menggerakkan semula pemacu perdagangan serta pelaburannya sebelum ini termasuk memberi tumpuan kepada bidang pertumbuhan strategik untuk menarik pelaburan luar negara.



Asas kejayaan ekonomi Malaysia bukan sahaja masih utuh, dalam pelbagai sudut, ia diperkukuh susulan berlakunya pandemik